

戊戌 上御朝講領經筵事尚震曰臣聞近日經席之上所啓稍有過激之辭自 上以趙光祖金安老時氣習為教人主向背所關至重言雖過激不出於私則當示以優容之量也趙光祖果是過激之人盡逐舊老之臣欲致至治於一朝大言無實者爭相付託卒使朝廷紛擾故其付託之人及其失志之後區區之態倍於常人金安老則托公濟私務為自勝之計如此之習自 上洞照而欲矯之 上意至矣然近日臺諫宰相所啓之事言雖過激皆藉為身謀也復設兩宗不治黨與大累君德故見君之累舉不忍謂吾君不能而如此啓之也自 上所當垂察也○兩司啓普雨及兩宗等事不允○遣大臣祈雨于宗廟社稷風雲雷雨壇累舉祀典而不得雨故也

己亥 上御朝講○兩司啓普雨及兩宗等事不允○弘文館上劄論普雨事不允○月暈兩珥色白東方南方如火氣辛丑兩司啓普雨及兩宗等事不允○弘文館上劄論普雨事不允○日微暈夜月微暈有雲五道如氣自北方至暈布天色